

Lébraste

*Lébraste tí miña nena
daquela noite de luar?
Tí contábal-as estrelas
i-eu as areas do mar.*

Foi pol-a banda de Vigo
Ai ondas do peito amigo!
Foi pol-a banda de Ares
Ai ondas dos meus pesares!

Varadas na escura praia
dous paquebotes sen velas
xuntan queixumes e bágoas
no albo pozo das penas.

Nin tí nin eu nos ollamos:
outros apagan estrelas.
Nin eu nin tí nos falamos:
outros contan as areas.

*Foi pol-a banda de Vigo
Ai ondas do peito amigo!*

9

A lúa é xa cinza morta
con cicatrices na cara,
os luceiros son suspiros
coitelos câ noite calan.

*Foi pol-a banda de Ares
Ai ondas dos meus pesares!*

Nin eu nin tí nos lembramos
daquela noite de luar:
tí alma en terra afogada
i-eu corpo morto no mar!

Rubia Barcia